

CEBUANO Heart Book

THE HEART OF MAN



COPYRIGHT
ISBN 0 908412 70 3

E-MAIL: info@angp.co.za

ALL NATIONS GOSPEL PUBLISHERS
P.O. BOX 2191, PRETORIA, 0001, R.S.A.

(A Gospel Literature Mission financed by donations)
(Reg. No. 1961/001798/08)

ANG KASINGKASING SA TAWO

O

ANG ESPIRITUAL NGA SALAMIN SA KASINGKASING

(Usa ka Tanghaga nga Gihulagway sa Napulo ka Larawan) Gikansa Pransiya kining diyutay'ng libro nga adunay mga larawan alang sa dugang nga pagpasabut sa tuig 1732. Gitawag ug nailhan kini nga "Espiritual nga Salamin sa Kasingkasing," o "Libro sa Kasingkasing", ug tungod sa halawom nga kamatuorang espirituhanon ug kabililhon, nagpadayon ang sirkulasyon niini sa halus tanang pinulongang Europeo ingon man sa daghang pinulongang Aprikano. Gibasa kini sa tanang matang sa katawhan sa nagkalainlaing tinoohan.

Daghan ang mibati sa kamatuoran sa saad sa Dios sa Daang Tugon nga natuman sa Bag-ong Tugon, "Hatagan ko usab kamo sa usa ka bag-o nga kasingkasing, ug ang usa ka bag-ong Espiritu igabutang ko sa sulod ninyo." (Ez. 36:26; Heb. 8:10).

Ang tanan nga nagahimog pagpakasala nagahimog paglapas sa sugo; kay ang pagpakasala mao may paglapas sa sugo.

Ug kamo sayud nga kadto Siya gipadayag aron sa pagkuha sa mga kasal-anan, ug diha Kaniya wala ing sala.

Ang tanan nga nagapabilin diha Kaniya dili magapakasala; ang tanan nga nagapakasala wala makakita Kaniya ni makaila Kaniya.

Mga anak, kinahanghan walay magapahisalaag kaninyo. Ang nagahimog pagkamatarung, matarung man maingon nga kadto siya matarung.

Ang nagahimog pagpakasala, iya sa yawa; kay ang yawa nagapakasala man sukad pa sa sinugdan. Ang hinungdan nganong gipadayag ang Anak sa Dios mao kini: aron sa paglaglag sa mga binuhatan sa yawa.

Ang matag-usa nga gipanganak gikan sa Dios dili magahimog pagpakasala; kay ang binhi sa Dios magapabilin man diha kaniya, ug siya dili makasala tungod kay siya gipanganak man gikan sa Dios.

Maila kon kinsa ang mga anak sa Dios ug kinsa ang mga anak sa yawa pinaagi niini: bisan kinsa nga wala maghimog pagkamatarung ug wala maghigugma sa iyang igsoon, kini siya dili iya sa Dios.

(1 Juan 3:4-10)

ANG KASINGKASING SA TAWO TEMPLO SA DIOS O BUHATAN NI SATANAS (1 Juan 3:4-10)

Samtang nagabasa ka niining libroha, itanom sa hunahuna nga daw usa kini ka salamin diin makita mo ang imong kaugalingon. Bisan pag usa ka ka irihis o Kristianos, walay tinoohan o kaha mitalikod sa Dios, makita mo ang imong kaugalingon ingon sa pagtan-aw sa Dios kanimo. "Ang tawo nagatan-aw sa panagway sa gawas, apan ang Ginoo nagatan-aw sa kasingkasing." (1 Samuel 16:7).

Si Satanas mao ang amahan sa tanang bakakon. Siya ang prinsipal sa kangitngit ug dios niining kalibutana. Nagpakaanghel siya sa kahayag aron paglimbong sa tawo. Niining panahona karon, ingon man kaniadto, adunay daghang mga mini nga apostoles ug limbongang mga tawo nga nagpakaaron-ingnon nga mga sumusunod ni Cristo. Dili kini angay'ng katingad-an kay si Satanas mismo nagtakoban man ganing usa ka anghel sa kahayag (2 Cor. 11:13,14). Si Satanas, nga dios niining kalibutana, nagbuta sa mga mata ug hunahuna sa katawhan aron dili sila makakita nga ang Dios naghigugma kanila, ni masayud nga si Jesus namatay aron busa wala sila makaila sa Dios. Giharian sila sa espiritu sa Dios niining kalibutana (Ef. 2:2). Gawas kung mabuka ang ilang mga mata niining ilang datang kahimtang, ang walay katapusang pagkalaglag maoy ilang padulungan. Ang nagasulti nga, "Wala akoy sala" nagalimbong lang sa iyang kaugalingon. "Ang hinungdan nganong gipadayag ang Anak sa Dios mao kini: aron sa paglaglag sa mga binuhatan sa yawa." (1 Juan 3:8). "Magpasakop kamo nga masinugtanon sa Dios; apan sukli ninyo ang yawa, ug kini siya mokaratil pagdalagan gikan kaninyo. Dumuol kamo sa Dios ug Siya moduol kaninyo." (Sant. 4:7,8).

Sa pagbasa mo niining libroha ug susihon ang mga larawan niini, makita mo ang imong kaugalingong kasingkasing. Tugoti ang madan-agong kahayag sa Dios nga magpadayag

sakahimtang sa imong kasingkasing. Dawata nga ikaw sal-an ug ayaw ipanghimakak ang imong sala. Ang Pulong sa Dios nagaingon kanato nga "Kon kita magaingon nga wala kitay sala, kita ra ang nagapahisalaag sa atong kaugalingon, ug wala kanato ang kamatuoran. Kon isugid ta ang atong mga sala, Siya kasaligan ug makatarunganon nga tungod niana mopasaylo Siya sa atong mga sala ug magahinlo kanato gikan sa tanang pagkadili makatarunganon." (1 Juan 1:1-10). "Ang dugo ni Jesu-Cristo, ang Anak sa Dios, nagahinlo kanato gikan sa tanang sala."

Ang Dios o si Satanas maoy naghari kanimo. Ulipon ka sa sala o sulogoon sa Dios. Kung ang sala maoy naghari sa imong kinabuhi, ayaw kini ipanghimakak, hinoon sangpita ang Dios. Hatagan ka Niya ug kagawasan pinaagi kang Jesu-Cristo nga mianhi sa kalibutan aron pagluwas sa mga makasasala ug aron paglumpag sa gahum ni Satanas ug sa sala nga nag-ulipon kanato. Siya ang atong kaluwasan. Anaa ka sa atubangan sa Dios nga balaan nga nakakita sa tanang tinagoan ug nasayud sa imong gihunahuna ug gibuhat. Dili gayud ikaw makatago gikan sa Dios, ni ang imong mga buhat, kay "Siya nga nagbuhat sa igdulungog, dili ba Siya makadungog? Siya nga nag-umol sa mata, dili ba Siya makakita?" (Salmo 94:9).

"Kay ang mga mata sa Ginoo nagadalagan ngadto-nganhi sa tibuok yuta, aron sa pagpakita sa Iyang kaugalingon nga makusganon alang kanila nga may kasingkasing nga hingpit alang Kaniya." (2 Cron. 16:9).


"Ang Iyang mga mata anaa sa mga alagianan sa usa ka tawo, ug Siya nagasud-ong sa tanan niyang mga lakang. Walay kangitngit, ni mabaga nga kangiub, diin makatago sa ilang kaugalingon ang mga mamumuhat sa kadautan." (Job 34:21,22).

"Apan sa Iyang bahin wala ni Jesus isalig ang Iyang kaugalingon ngadto kanila, kay Siya nasayud man sa tanang tawo." (Juan 2:24,25). Busa "bulahan siya kung kinsang kalapasan gipasaylo, kang kinsang sala gitabonan. Bulahan ang tawo nga kaniya wala pagisipa sa Ginoo ang kasal-anan, ug diha sa iyang espiritu walay limbong." (Salmo 32:1,2). Basaha usab ang Salmo 51. Hangtud karon si Jesus nagatawag pa gihapon: "Umari Kanako, kamong tanan nga nabudlay ug nabug-atan, ug papahulayon Ko kamo." (Mateo 11:28).

1. ANG UNANG LARAWAN

Kini nga larawan nagpakita sa kasingkasing sa usa ka tawong kalibutanon ug makasasala, giharian sa espiritu niining kalibutan ug sa mainitong tinguha sa iyang makasasalang unod. Ingon niini ang matuod nga larawan nga nakita sa Dios. Ang nagpulang mga mata nagpakita sa kahimtang sa usa ka hubog ingon sa gilarawan sa Proverbio 23:29-33: "Kinsa man ang may kasakit? Kinsa man ang may kasubo? Kinsa man ang may panagkabingkil? Kinsa man ang may pagbagulbol? Kinsa man ang may mga samad sa walay gipasikaran? Kinsa man ang may kapula sa mga mata? Mao kadtong magapabilin sa pag-inum-inum ug bino; kadtong magapanggula aron sa pagpangita sa sinakot nga bino. Dili ka magtan-aw sa bino kong kini magapula, kong kini magapangidlap sulod sa kopa, sa diha nga kini magaagay nga mahapsay. Kay sa katapusan kini magapamaak sama sa bitin, ug molikos sama sa udto-udto. Ang imong mga mata makasud-ong sa mga butang nga katingalahan, ug ang imong kasingkasing magapamulong sa baliko nga mga butang."

Sa ubos sa ulo niini nga larawan, makita mo nga ang kasingkasing sa tawo gipuy-an sa nagkalainlaing mananap nga nagsul-ob sa daghang nagkalainlaing sala, kay ang kasingkasing mao ang gipuy-an ug gigikanan sa atong mga sala. Misulti kanato ang Dios pinaagi sa iyang propetang si Jeremias, nga "ang kasingkasing malimbongon labaw sa tanang mga butang, ug



hilabihan gayud pagkadautan: kinsay makasusi niini?" (Jeremias 17:9). Gimatuod kini mismo ni Jesus sa Iyang pag-ingon, "Kay gikan sa sulod, gikan sa kasingkasing sa tawo, nagagula ang mga dautang hunahuna, pakighilawas, pangawat, pagbuno, panapaw, kaibog, kadautan, limbong, kaulag, kasina, panulti sa pagbuling sa dungog, pagkamapahitas-on, binoang: tanan kining mga butanga nga dautan nagagikan sa sulod, ug mao kini ang makapahugaw sa tawo." (Marcos 7:21-23).

1. **ANG PABO REAL** Ang katahom sa pabo real gidayeg sa tanan, apan dinhi sa kasingkasing sa tawo gipakita niya ang sala sa pagkamapahitas-on.

Ang pagkamapahitas-on nagagikan sa kinatung-an sa impierno, ug nagpakita sa iyang kaugalingon sa daghang mga paagi. Adunay mga tawong mapahitas-on tungod sa ilang bahandi, sa ilang hataas nga edukasyon. Anaay namisti sunod sa bag-ong urog bisan kon ang ilang lawas makita nga salawayon; ang pag-adorno sa ilang kaugalingon sa mga alahas, pulseras, singsing ug uban pa, sama sa gilarawan sa Isaias 3:17-24. Ang uban mga mapahitas-on tungod sa ilang gigikanang kaliwat, pamanit, kultura, ug uban pa, apan nalimot sila nga "ang Dios magabatok sa mga mapahitas-on, apan sa mga mapaubsanon Siya magahatag ug grasya." (1 Pedro 5:5). Gidumtan sa Dios ang pagkagarboso ug pagkamapahitas-on (Proverbio 8:13). "Ang pagkagarboso magauga sa pagkalaglag, ug ang mapahitas-ong espiritu magauga sa pagkahulog." (Proverbio 16:18).

2. **ANG KANDING** Naglarawan kini sa mga kaibog sa unod, imoralidad, pakighilawas, panapaw. Ang mga sala nga nanganlan sa itaas misamot kahugaw niining moderno natong panahon. Hilabihan na gayud kini kaayo busa matuod ang giingon ni Jesus sa Iyang pagtagna, may mga 2,000 nga ka tuig ang milabay, nga ang katapusang mga adlaw mahisama sa Sodoma ug Gomora. Kining bag-ong diwa nag-ulipon sa mga lalaki ug babaye ug nakasulod sa puloy-anan sa mga tawong relihiyoso, sa mga eskuwelahan ug sa mga buhatan. Kining dautang binhi gisabwag

sa walay kukaulaw ug sa paaging yawan-on ug malimbongon nganha sa kasingkas-ing sa tawo pinaagi sa mga sinehan, entablado, mahugaw nga basahon, ug sa daghan pang uban nga paagi, ug ang gitawag sa Dios nga sala giisip na hinoon nga bag-ong moralidad. Libo ka libong kabataan ang nagmugna sa ilang kaugalingong sulondong kinabuhi gikan sa ilang nakita sa sine ug sa mga nobela, nga nagdala na lamang kanila sa kagubot, kaulaw, ug mapait nga pagbasol. Mga artistang imoral ug magubot nga kinabuhi maoy nahimong idolo sa mga kabataan. Ang baylehan usab kanunayng nahimong salag sa imoralidad. Wala na himoang sulondon ang kinabuhi sa maligdong nga mga bayani sa Ginoo ingon kang Jose (Genesis 39) ug uban pa. Kining atong gitawag nga sibilisadong katawhan angayng matudloan sa tigulang ug paganong taga-Sulu kang kansang mga mananapaw ilang hukman sa kamatayon. Malagmit makatindog pa gani sila aron pagsudya kanato sa adlaw sa paghukom. Gipasidan-an kita sa Dios paglikay sa pakighilawas kay kini dili butang nga katiawtiawan. "Ang tanang ubang sala nga pagabuhaton sa tawo anaa ra sa gawas sa iyang lawas; apan ang tawong makihilawason nagapakasala batok sa iyang kaugalingong lawas. Wala ba kamo masayud nga ang inyong lawas templo sa Espiritu Santo nga nagapuyo sa sulod ninyo, ug nga kini inyong nabatongan gikan sa Dios? Kamo dili na inyo sa inyong kaugalinon." (1 Cor. 6:18,19); "Kon adunay molaglag sa templo sa Dios, siya pagalaglagon sa Dios. Kay ang templo sa Dios balaan, ug kanang temploha mao kamo." (1 Cor. 3:17).

3. ANG BABOY nagahisgut sa mga sala sa tawong palahubog ug sobra kadalo sa pagkaon. Mahugaw nga mananap ang baboy, nga mokaon sa bisag unsang makita, malimpiyo man o mahugaw. Sa samang paagi, ang makasasalang kasingkasing mokaon sa bisag unsang mahugaw nga sugyot, pinulongan, mahilas nga mga larawan ug basahon, ug uban pa. Ang lawas nga mao untay templo sa buhi nga Dios nahugawan tungod sa mahugaw'ng pagkaon ug bisyo ingon sa pagsigarilyo, paggamit ug opyo ug makadaut nga tambal ug tabletas. Sukad masukad daghan na karong mga tawo ang nagpaulipon sa sigarilyo ug sa opyo. Ang gahum lamang sa Dios ang makaluwas niining makalolooy nga mga ulipon sa bisyo ug sa yawa. Anaay daghang relihiyosong mga tawo nga dili mosigarilyo sa sulod sa simbahan kay nagtoo man sila nga usa kini ka pagpanamastamas sa balaang dapit. Apan sa walay panagana, kung gawas sila sa simbahan, wala silay pagtahud niining matuod nga templo sa Dios-ang ilang lawas-nga gihugawan nila pinaagi sa mabaho nga dahon. "Wala ba kamo masayud," miingon si Apostol Pablo, "nga kamo templo sa Dios ug nga ang Espiritu sa Dios nagapuyo diha sa sulod ninyo? Kon adunay molaglag sa templo sa Dios, siya pagalaglagon sa Dios." (1 Cor. 3:16,17).

Ang tawong hilabihan kadalo sa pagkaon mangil-ad atubangan sa Dios. Nagakaon kita aron mabuhi, dili kita buhi aron mokaon. Ang kagutom matambalan sa makaayo sa lawas nga pagkaon apan ang kaibog kanunayng mosinggit, "Hatagi pa ako."

Ang makasasalang kaibog dili gayud mabusog. Sumala pa sa balaod sa Daang Tugon, pagabatohon hangtud mamatay ang dalo sa pagkaon ug ang palahubog (Deut. 21:18-21). "Ang palahubog ug ang ulitan modangat sa kawalad-on; ug ang pagkahingatulog magapasaput sa usa ka tawo sa mga nuog. Kadtong kauban sa mga ulitan nagapakaulaw sa iyang amahan." (Prov. 23:21; Prov. 28:7). Hinumdomi ang usa ka adunahan, usa ka hakog ug ulipon sa iyang makasasalang kaibog, namatay ug didto gibalhog sa impiyerno. Ug didto mihangad siya aron magpatabang tungod sa hilabihang pagantus nga iyang naaguman. Ang kadautan sa ilimnong makahubog dili na angay hisgut pa. Nasayud na ang tanan sa nihimong bunga niini ug dili kini butang nga katiawan lang. Dayag kaayong miingon ang Dios kanato sa Iyang Pulong nga ang palahubog dili makapanunod sa gingharian sa Dios. Dili pagkaon ang bino. Usa kini ka makapatay nga ilimnon nga molibog ug mo-apektar sa hunahuna, aron kadtong moinom niini magbuhat ug binoang nga butang. Nahimo silang imoral ug mopatay pa gani, butang nga dili nila

himoon kung dili pa sila hubog. "Ang bino maoy usa ka tigtamay, ang maisug nga ilimnon mao ang sabaan. Ug bisan kinsa nga masayop tungod niini dili manggialamon." (Prov. 20:1)

Kadtong naghimo ug nagbaligyag makahubog nga ilimnon nakasala usab atubangan sa Dios, kay ang Dios miingon, "Alaut kadtong makusog nga moinom sa bino, ug mga tawo nga kusganon sa pagsakot sa maisug nga ilimnon." (Isaias

5:22). "Alaut kadtong nagapainom sa makahubog sa iyang isigkatawo... ug nagapahubog kaniya usab." (Hab. 2:15). "Ang alpa ug ang sista, pandereta ug ang mga flauta, ug ang bino anaa sa ilang mga kombira; apan sila wala managtagad sa buhat ni Jehova, ni managpalandong sila sa ginahimo sa iyang mga kamot." (Isaias 5:12). "Ayaw kamo pagpalimbong; walay mga makihilawason, o mga tigsimba ug mga diosdios, o mga mananapaw, o mga bayot, o mga kawatan, o mga dalo, o mga palahubog, o mga tigpasipala, o mga tulisan, nga makapanunod sa gingharian sa Dios." (1

Cor.6:9,10).

Dili gayud masaypan ang mga sala sa atong kalibutanong kinaiya. Ania ang uban kanila: panapaw, kahugaw, kaulag, pagsimba sa mga dios-dios, panglamat, panag-away, panagsumpaki, kasina, hilabihan nga kasuko, palabwanay, iyaiyahay, pundokpundok, pangabubho, huboghubog, ug ang mga butang nga maingon-ingon niini Sila nga nagabuhat sa maong mga butang dili makapanunod sa gingharian sa Dios (Gal. 5:19-21). "Ayaw kamo pagpahubog ug bino, kay kana maoy pagpatuyang, kondili magpapuno hinoon kamog Espiritu." (Ef. 5:18).

Ania ang pagdapit ni Jesus sa mga giuhaw: "Kon adunay tawong giuhaw, umari siya Kanako ug uminom sa tubig nga buhi." (Juan 7:37,38). "Ang tagsa-tagsa nga ginauhaw, umari kamo sa mga tubig, ug siya nga walay salapi; umari kamo, pumalit, ug komaon; Oo, umari kamo, palit ug bino ug gatas sa walay salapi ug sa walay bili." (Isa. 55:1). "Bisan kinsa nga magainom sa tubig nga Akong igahatag kaniya dili na gayud pagauhawon; kay ang tubig nga Akong igahatag kaniya mahimong diha sa sulod niya usa ka tubod sa tubig nga magatubo ngadto sa pagkakinabuhing dayon." (Juan 4:14).

4. ANG PAWIKAN naglarawan sa katapolan, paglanganlangan ug pagkamagbabarang. Ang pagka walay pagtoo sama ra sa sala sa pagbarang. "Ang tinguha sa tapolan nagapatay kaniya; kay ang iyang mga kamot nagadumili sa pagbuhat. Adunay maibog sa pagkahakog gayud sa tibuok adlaw." (Proverbio 21:25,26). Gipinahan ni Josue ang mga anak sa Israel, "Ayaw pagtapol sa pagadto ug sa pagsulod aron sa pagpanag-iya sa yuta." (Maghuhukom 18:9). Hilabihan katapolan ang kinaiyang tawhanon sa pagpanagiya sa mga butang sa Dios. Miingon si Jesus, "Panlimbasugi ninyo ang pagsulod agi sa pultahan nga masigpit." (Lucas 13:24). "Pangita ug kamo makakaplag." "Ang gingharian sa langit nakaagum na sa mga paglubog, ug kini ginaagaw sa mga manglolugos pinaagig kusog." (Mateo 11:12).

Ang atong katapolan pag-angkon sa kaluwasan ug kaayohang espiritual magdala kanato sa atong kalaglagaan. Mao kanay nagpugong kanato sa pag-ampo, sa pagpangita sa halawom nga mga butang bahin sa Dios, ug sa pagpanagiya sa labing bulahang mga saad sa Dios. Nagtultol kini kanato sa atong kalaglagaan. Kung sultihan ka sa Dios, agdahon ka pagtugyan sa imong kasingkasing Kaniya, Karon dayon, ang yawa usab modason pag-ingon nga ugma mo na kana buhata, o sa ubang adlaw. Makalolooy ka kay kanang adlaw dili na moabut. Mamatay ka nga walay kaluwasan ug wala si Cristo kanimo. Ang Dios miingon, "Karong adlaw, inigkadungog ninyo sa iyang tingog, ayaw ninyo pagahia ang inyong mga kasingkasing." (Hebreohanon 3:7,8). Pila na kaha ka tawo ang nangawala tungod sa ilang paglangan pagdawat sa kaluwasan, pag-uswag nga sa ubang adlaw na. Apan kanang "ubang adlaw" wala na moabut. Dili ikaw ang tag-iya sa ugma.

Ang alukaba sa pawikan sagad maoy gigamit sa ubang mga magbabarang sa pagbuhat nila ug barang. Ug dinhi gihisgutan ang sala sa pagsalig ug paghimog buhat ug barang, panagna sa

kapalaran, panglamat. Sala ang pagsalig kanila inay maoy saligan ang buhi nga Dios. Labi na kung panahon sa pagsulay ug sakit, disgrasya ug kagul-anan, giagda kita pagsangpit sa buhi nga Dios, nga andam sa pagtabang, inay maoy saligan ang maayo o dautang suwerte; kay ang mga "paglakaw sa tawo gitukod sa Ginoo." (Salmo 37:23). "Aduna ba kaninyoy nagamasakiton? Ipakuha niya ang mga anciano sa Iglesia, ug paampo sila alang kaniya, nga magahaplas kaniya ug lana tungod sa ngalan sa Ginoo; ug ang pag-ampo nga inubang pagtoo magaayo sa masakiton, ug siya pagabangonon sa Ginoo; ug kon siya nakasala man, siya pagapasayloon. Busa ngadto sa usa ug usa magsinugiray kamo sa inyong mga sala, ug pag-ampo kamo alang sa ug usa, aron kamo magaayo." (Santiago 5:14-16). "Dili gikan sa silangan, ni sa kasadpan, ni gikan pa sa habagatan magagikan ang pagbayaw sa itaas Apan ang Dios mao ang maghuhukom." (Salmo 75:6,7). Gisugo sa Dios ang mga anak sa Israel nga, "Dili hikaplagnan uban kanimo ang bisan kinsa nga magpaagi sa iyang anak nga lalaki kon anak nga babaye sa kalayo, usa nga nagagamit sa pagtagna, usa nga nagapanghimalad, kon anting-antingan, kon kiwatahan; kon magwiwili, kon magpapakitambag sa mga kailang espiritu (ingon sa espiritista), kon mag-iila nga malalangon, kon magpapangutana sa mga minatay. Kay dulomtanan alang sa Ginoo ang bisan kinsa nga magabuhat niining mga butanga." (Deut. 18:10-12). Sa gawas sa gingharian sa Dios anaa "ang mga lumayan, ug ang mga makihilawason, ug mga mamumuno, ug ang mga magsisimba'g mga diosdios, ug ang tanang nagahigugma ug nagabatasan sa pagpamakak." (Pinadayag 22:15). Dili ka gayud modangop sa mga espiritista, o sa mga maghihimalad, ni mangutana kanila, kay makasala ka lang uban kanila ug mahugawan. "Ako mao ang Ginoo nga inyong Dios." (Lev. 19:31). "Ug sa diha nga sila managingon kaninyo, Mangadto kamo niadtong mga espiritista ug mga salamangkiro nga managpiyak ug managyagubyub: dili ba unta mangadto ang katawhan sa pagpangita sa ilang Dios? tungod sa mga buhi pangitaon ba nila ang mga patay? Ngadto sa Kasugoan ug sa pagpamatuod: kong sila dili managsulti sumala niining pulonga, sa pagkamatuod, walay kabuntagon alang kanila." (Isaias 8:19,20).

Samtang nagabasa ka niining libroha, ang Dios nagapakig-sulti kanimo, nagdapit kanimo sa paghinulsol sa imong mga sala ug sa pagtugyan sa imong kinabuhi ngadto kaniya, apan ang espiritu sa pawikan nga anaa sa imong kasingkasing naghimog nagkalainlaing mga pagtintal, aron langan-langanon mo ang imong hukom nga alang sa Dios. Nanlimbasug kini pagpuno sa imong kasingkasing sa kahadlok, hangtud makapangutana ka sa imong kaugalingon "Unsa kahay isulti sa mga kaubanan ko, sa akong mga higala, sa kalibutan, kung mahimo akong usa sa matuod nga Kristohanon? "Unsa may mahitabo kung dili ako mosalmot sa sayaw, piging ug kalibutanong kalingawan?" Inay maoy imong makita ang di masukod nga bahandi ni Jesu-Cristo, ang Iyang kalinaw, ang di mahubit nga kalipay nga gikan Kaniya, ang Iyang himaya ug ang walay katapusan nga kinabuhi nga puno sa kalipay, mao na hinooy imong kabalak-an ang mga butang nga imong talikdan kung ipasulod mo si Cristo sa imong kasingkasing. Ug magpadayon ang imong kahadlok sa tawo ingon man ang imong kahadlok sa kamatayon, ug nahimo kang ulipon sa yawa. Apan si Cristo mianhi aron sa pagluwas kanilang tanan nga tungod sa kahadlok sa kamatayon nailalum sa pagkaulipon sulod sa tibuok nilang kinabuhi (Heb. 2:14,15). Ang espiritu sa paglangan-langan nagpagahi sa imong kasingkasing hangtud nahimo kining magahi sama sa likod sa pawikan.

5. ANG LEOPARDO maoy usa ka mananap nga hilabihan kaisug ug mapintas. Ang pagdumot, kasuko ug ang dautang buot usahay maoy naghari sa kasingkasing sa tawo hangtud siya mopatay. Bisin unsaon mo'g panlimbasug pagpugong sa imong kaugalingong kasuko, moabut gayud ang panahon nga mobuto ang imong dughan sa hilabihang kalagot. Maayo pag dawaton mo nga anaa kana sa imong kasingkasing, ug hangyoha si Jesus pagluwas kanimo. "Biyaan mo ang kasuko, ug ayran mo ang kaligutgot, dili ka maguol kay kana nagapaingon ngadto sa buhat nga dautan." (Salmo 37:8). "Ang kasuko dagmalan, ug ang kaligutgot makapalumos, apan kinsa ba ang makaasdang sa atubangan sa pangabugho?"

(Prov. 27:4). "Ang kasuko nagapuyo sa sabakan sa mga buangbuang, busa kuhaa ang kasuko gikan sa imong kasingkasing." (Ecc. 7:9; 11:10). Isalikway ninyo ang tanang mga kasuko. (Col. 3:8).

Daghang talawan ang moinom una aron kuno mahatagan silag kaisog pagpadayon sa buot nilang buhaton nga dautan o kaha manimalus, apan "ang ilang bino hilo man sa mga dragon, ug hilo nga mabangis sa mga malala nga sawa." (Deut. 32:33). Matam-is ang manimalus alang sa makasasalang kasingkasing, apan ang Dios maoy manimalus alang kanato. Si Jesus miingon, "Higugmaa ang imong silingan ingon sa paghigugma mo sa imong kaugalingon" ug "higugmaa ang imong mga kaaway." Gisaaran kita sa Dios nga Iyang pasayloon ang atong mga sala kung kita mopasaylo sa mga tawong nakasala kanato. Ang tawong mainit ug ulo ug bagulbolan mangil-ad atubangan sa Dios. Ang yawan-ong tinguha pagpaula sa dugo ug sa gubat anaa sa kasingkasing sa tawo; tungod niini ang matuod nga kalinaw kinahanglang ipasulod sa kasingkasing aron kini motunhay.

6. ANG HALAS maoy naglimbong kang Eva sa tanaman sa Eden. Tungod niini gibungkag niya ang matam-is nga panaghiusa ug panagsabtanay sa Dios ug sa tawo. Kanhing usa ka anghel si Satanas apan nakasala siya. Sa pagkakita niya nga si Adan ug si Eva maoy nagmando sa kalibutan ug nagpuyo sa hingpit nga panaghiusa sa Dios, nga mipuli sa lugar ni Lucifer, nangabugho siya. Tungod sa pagpangabugho ni Satanas, gilaraw niya ang paglaglag kanila ug milampus siya. Gigun-ob niya ang ilang kinabuhi ug hingpit sa kalipay nga panagsinabtanay nila sa Dios. Ang samang yawan-on nga pangabugho ug kasina sa kasingkasing sa tawo makagun-ob sa kalipay sa pipila ka tawo inigkakita nila nga ang uban mga malipayon ug nagpuyo sa kahamugaway. "Ang pangabugho mabangis ingon sa Sheol." (Awit ni Solomon

8:6). Naghatud kini ug yawan-ong hunahuna ngadto sa kasingkasing aron pagputol sa kalipay sa uban, ug makadaldal pa gani kini sa pagpatay. Nahitabo kini ilabi na sa pipila diha sa kaminyoon. Sa negosyo ug ingon man sa ubang lakaw sa kinabuhi dili maihap nga kaguol ug pagdumot ang nahimong bunga niini. Anaa pa gani dihay mga Kristohanong magtatabang, magwawali ug ministro ang mobati niini nga sala kung ugaling makita nila nga labawng gigamit sa Dios ang ubang mga tawo sa pag-alagad Kaniya. Kinahanglan gayud nga kanunay silang magbantay ug mapuno sa lunsay nga gugma sa Dios nga gibubo Niya sa atong kasingkasing pinaagi sa Espiritu Santo, kay unya'g mamansahan sa yawan-ong pangabugho ang ilang pag-alagad sa Dios.

7. ANG BAKI nga nagakaon sa yuta naglarawan sa mga sala sa kahakog ug sa paghigugma sa salapi nga maoy gamut sa tanang pagkadautan. (1 Tim. 6:10). Anaay matang sa mga baki sa nasud sa Congo. Aprika nga nagakaon sa hulmigas ug dili sila mohunong hangtud dili sila mobuto sa kabusog ug mamatay. Ang usa ka tawong hakog dili buot motabang sa mga kabus ug nanginahanglan. Nanlimbasug hinoon siya sa minaayo ug dinautang paagi pagtigum ug pagpanag-iya sa bahandi niining kalibutan, bahandi nga agupopon ug kutkoton sa taya. Si Jesus mismo miingon, "Ayaw kamo pagtigum ug mga bahandi alang kaninyo dinhi sa yuta diin ang tangkob ug ang taya magakutkot, ug diin ang mga kawatan nagapanakasaka ug nagapangawat; hinonoa pagtigum kamog mga bahandi alang kaninyo didto sa langit diin walay tangkob ni taya nga magakutkot ug diin walay mga kawatan nga magapanakasaka ug magapangawat. Kay hain gani ang imong bahandi, atua usab didto ang imong kasingkasing." (Mat. 6:19-21). Gipamatay sila si Akan ug ang iyang pamilya tungod sa iyang hilabihang paghigugma sa bulawan, salapi, mahalang mga alahas ug panapton (Josue

7). Naghikog ang usa ka tinun-an ni Jesus nga si Judas Iscariote tungod kay ang iyang gugma sa kuwarta naghimo kaniya pagbudhi sa iyang Ginoo ug Agalon. Dili dautan ang kuwarta, ni ang bulawan. Maoy dautan ang paghigugma sa kuwarta nga nagpahipi sa kasingkasing sa tawo.

Libo ka libong mga lalaki ug babaye gikan sa tanang matang sa kinabuhi ug kaliwat migun-ob sa ilang kinabuhi ug sa kinabuhi sa ilang pamilya tungod sa ilang yawan-ong tinguha pag-angkon sa dagku nga bahandi. Ila kining gihimo pinaagi sa pagsugal ug pamusta sa dakung kantidad sa karera ug uban pa. Ang tinguha nga mahimo dayong adunahan sa paaging masayon nagadaldal sa tawo pagpangawat ug pagpatay ingon man sa paghikog. Ang paghigugma sa kuwarta ug ang kahakog adunay mga kauban, ingon sa tinguha nga mahimong bantugan. Anaa pa ang paghigugma sa gahum; mahimong kini politikanhong gahum aron mandoan ang uban, gahum sa sapi aron daugdaugon ang kabus. Anaa pay gahum sa relihiyon, nga labaw pang mainitong moalagad alang sa pundok sa Iglesia kay sa Dios hangtud sawayon niya ang bisag kinsang moalagad kang Cristo nga dili sakop sa iyang simbahan (Marcos 9:38). Miingon si Jesus, "Magmatngon kamo, ug likayi ninyo ang tanang dagway sa kadalo, kay ang kinabuhi sa tawo wala diha sa kadagaya sa iyang mga katigayonan." (Lucas 12:15). Anaay gisugilon kanato ang Biblia bahin sa usa ka hangalnga adunahan: "Ang yuta sa usa ka tawong dato mihatag ug daghang abut. Ug namalandong siya sa iyang kaugalingon nga nagingon, Unsa may akong buhaton, kay wala man akoy katipigan sa akong mga abut?" Ug siya miingon, "Ang akong buhaton mao kini: Akong gubaon ang akong mga bodiga, ug tukoron ko ang labi pang daku; ug sulod niini tipigan ko ang akong tanang abut ug mga kabtangan. Ug unya magaingon ako sa akong kalag, 'Kalag, gikatagan-an na ikaw'g ubay-ubay'ng bahandi alang sa daghang katuigan; pumahulay ka, kumaon ka, uminom ka, ug magsadya da.' Apan ang Dios miingon kaniya,

'Oy, boang! Karong gabhiona ang imong kalag pagakuhaon gikan kanimo; ug kinsa na may makapanag-iyu sa mga butgang nga imong gitagana?' Maingon niana ang nagatigum ug mga bahandi alang sa iyang kaugalingon, apan dili bahandianon ngadto sa Dios." (Lucas 12:16-21). "Kay unsa may kapuslanan alang sa usa ka tawo ang pagpakaangkon niya sa tibuok kalibutan nga pagapildihan sa iyang kinabuhi?" (Marcos 8:36). "Ayaw na kamo pagkabalaka bahin sa inyong kinabuhi, kon unsay inyong kan-on, o bahin sa inyong lawas, kon unsay inyong ibisti... Apan mao hinooy pangitaa ninyo ang iyang gingharian, ug unya kining mga butanga igadugang ra kaninyo... Kay hain gani ang inyong bahandi, atua usab ang inyong kasingkasing." (Lucas 12:22-34).

8. SI SATANAS nga amahan sa tanang bakak ug sa mga bakakon maoy naghulhog sa pagbuhat sa nagkalainlaing sala. Siya ang naghari sa kasingkasing. Si Jesus miingon, "Kamo gikan sa inyong amahan nga mao ang yawa, ug ang inyong tinguha mao ang pagtagbaw sa mga pangibog sa inyong amahan. Siya maoy usa ka mamumuno sukad pa sa sinugdan, ug siya walay labut sa kamatuoran kay ang kamatuoran wala man diha kaniya. Inigpamakak niya, siya magasulti tukma sa iyang kaugalingong kinaiya, kay siya bakakon man ug mao ang amahan sa mga bakak." (Juan 8:14). Ang gamay nga bakak ingon ra usab kadautan sa daku. Adunay mga bakak nga gisulti, gisulat, ug gibuhat. Ang maot usa ka bakakon kay nagpaka-aron-ingnon man lang siya. Dili bakakon ang Dios-ingon man ang mga Kristohanon (Tito 1:2). "Kon kita magaingon nga may pakig-ambitay kita uban Kaniya, apan nagalakaw usab kita diha sa kangitngit, nan, kita nagabakak ug wala magkinabuhi subay sa kamatuoran." (1 Juan 1:6). "Sa gawas anaa ang mga iro, ug ang mga lumayan, ug ang mga makihilawason, ug ang mga mamumuno, ug ang mga magsisimbag mga diosdios, ug ang tanang nagahigugma ug nagabatatan sa pagpamakak." (Pin. 22:15). Gidumtan sa Dios ang usa ka bakakong saksi. (Proverbio 6:19).

9. ANG BITOON naglarawan sa tanlag sa kasingkasing sa tawo. Ania siya, nahugawan ug nahimong dautan. Malagmit patay na tungod sa mapadayonon ug kinabubut-on nga pagpakasala. Tungod kay kini buta ug mangil-ad, wala na kiniy gahum paghukom kon ang iyang mga buhat maayo ba o dautan. Usahay mahilum kining tanlag nga dautan ug usahay mosamok kini. Nanudya inay mopasaylo, ug nagpasaylo inay manudya. Maora kinig napasos sa binagang puthaw

ug wala na batia niini tungod iyang pagbiya sa pagtoo, ug maoy gihataga'g pagtagad ang mga malimbongong espiritu ug ang doktrina sa yawa, ug ang pagpamakak pinaagi sa pagpakaaron-ingnon.' (1 Tim. 4:1,2; Heb. 10:22).

10. ANG MATA sa Dios nakakita sa tanang kalihokan sa kasingkasing. Walay matago gikan sa Iyang nagkalayong mata. Busa nasayud Siya ug nakita Niya ang tanang sekretong mga hunahuna ug mga laraw sa kasingkasing. Bisan pa'g buhaton mo ang dautan sa kangitngit sa gabii, o sa baga nga lasang, o sa ilalum sa yuta, o bisag asa, makita kini sa Dios. (Ang mata sa mga larawan gipaangay ingon sa gipakita sa panagway sa tawo.)

11. ANG MGA GAGMAYNG DILA NGA KALAYO nga naglibot sa kasingkasing naglarawan sa gugma sa Dios nga naglikos sa makasasalang kasingkasing. Bisan pag gidumtan sa Dios ang sala, gihigugma gihapon Niya ang tawo ug dili Niya tinguha nga mamatay ang makasasala. Hilabihan ang kalipay sa mga panon sa langit kung adunay usa ka makasasala nga maghinulsol. Ang gagmay'ng mga dila nagpasabut usab sa dugo ni Jesu-Cristo, "ang Kordero sa Dios nga nagakuha sa sala sa kalibutan."

12. ANG ANGHEL nagpasabut sa Pulong sa Dios. Buot makigsulti ang Dios sa matag lalaki ug babaye nga nalimbongan ug nahimong ulipon sa sala, aron sila maghinulsol ug ipasulod ang kahayag ug gugma sa Dios nganha sa ilang kasingkasing.

13. ANG SALAMPATI maoy timaan sa Espiritu Santo, ang Espiritu sa kamatuoran nga mohukom sa tawo ug magpakita kaniya sa iyang kasal-anan ug sa iyang panginahanglan nga himoong matarung. Dinhi ang Espiritu Santo ana sa gawas sa kasingkasing. Dili Siya makasulod sa dapit nga giharian sa sala.

Kung ugaling ang kahimtang sa imong kasingkasing nahisama niini nga larawan sa kasingkasing, buhata ang pagtawag sa Gino. Bukha ang imong kasingkasing Kaniya. Tugoting modan-ag dinhi ang kahayag sa Iyang Pulong. "Motoo ka sa Ginoong si Jesu-Cristo ug maluwas ka." Nagsaad ang Dios, Oo, andam Siya pagbag-o sa imong kasingkasing, hatagan ka'g bag-ong kasingkasing ug bag-ong espiritu sa sulod niini. Gipakita kini diha sa ikaduhang larawan.

2. ANG HINUKMAN UG MIAMPO NGA KASINGKASING

Kini nga larawan nagpakita sa mahinulsolong kasingkasing nga nangita sa Dios. Nagkupot ang anghel ug espada, ang Pulong sa Dios, nga "labi pang mahait kay sa espada nga duhay sulab, ug modulot ngadto sa gitagboan sa kalag ug espiritu, sa mga lutahan ug sa mga kauyokan, ug motugkad sa mga hunahuna ug katuyoan sa kasingkasing." (Heb. 4:12). Ang Pulong sa Dios nagpahinumdom kaniya nga ang "bayad sa sala mao ang kamatayon," ug nga "ang tawo ginabutan nga mamatay sa makausa ra, ug tapus niana mao ang hukom." (Heb. 9:27). Mahimong bahin sa makasasala ug sa mga dili magtotoo ang linaw sa kalayo nga nagdilaab sa asupre.

Sa pikas usab nga kamot sa anghel anaay iyang dala nga kalabera. Usa kini ka pagpahinumdom sa makasasala nga kitang tanan mamatay. Gihupong nato ang atong lawas sa gugma, gibistihan, gipakaon ug gipatahum, gialimahan ug maayo aron pagtagbaw sa kalibutanong kaibog ug mga tinguha. Apan mamatay kini ug madunot, ug hutdon sa ulod, samtang ang atong kalag ug espiritu buhi sa hangtud ug moatubang sa Dios sa adlaw sa paghukom.

Dinhi makita nato ang makasasala nga nagsugod nang mamati sa mensahe sa Dios ug giabrihan niya ang iyang kasingkasing sa gugma sa Dios. Nagsugod usab pagdan-ag ang Espiritu Santo sa mangitngit ug makasasalang kasingkasing, Misulod na sa iyang templo ang kahayag sa Dios aron mawala ang kangitngit. Inigsulod sa kahayag sa Dios, ang kangitngit




kinahanglang mobiya. Ang sala nga gilarawan sa nagkalainlaing mananap kinahanglang mamahawa. Busa, mga minahal nga magbabasa, tugoti'ng mosulod sa imong kasingkasing si Jesus nga mao ang Kahayag sa kalibutan. Kinahanglang papahawaon ang kangitngit ug ang mga buhat sa kangitngit gikan sa kasingkasing ingon sa gipakita niini nga larawan. Miingon si Jesus, "Ako mao ang kahayag alang sa kalibutan, siya nga magasunod Kanako dili gayud magalakaw sa kangitngit." (Juan 8:12). Dili ka gayud molampus pagpapahawa sa kangitngit gikan sa imong kasingkasing pinaagi sa imong kaugalingong pagpanlimbasug, kaugalingong hibalo, sa kaalam sa tawo. Ang labing masayon, labing husto, labing madali, labing mapuslanon ug bugtong paagi mao ang pagpasulod kang Jesus, ang Kahayag, aron mopahawa ang kangitngit, nga mao ang sala. Makatabang

kanato ang bulan ug ang bitoon sa mangitngit nga gabii, apan kung magpakita na gani ang adlaw, mawala na dayon ang kangitngit ug ang gagmay'ng mga kahayag. Si Jesus mao ang Adlaw sa pagkamatarung. Sa pagsulod Niya sa templo sa Jerusalem, giabog Niya ang tanang namaligyag baka, karnero ug salampati, ug gipanglin tuwad Niya ang mga lamisa sa mga tigpangilis sa kuwarta uban sa pag-ingon, "Nahisulat kini, ang Akong balay pagatwgon nga balay'ng ampoanan; apan gihimo ninyo kini nga langub sa mga tulisan." (Mat. 21:13). Gilaraw nang daan sa Dios nga ang imong kasingkasing himoon Niyang puloyanan, Iyang templo. Buot Niyang puy-an kini, patahumon, pun-on sa kahayag, gugma ug kalipay. Si Jesus mianhi dili lamang aron pagpasaylo sa atong mga sala, apan mianhi Siya aron pagluwas kanato ug hatagag kagawasan gikan sa gahum ug paghari sa sala. "Kon ang anak (Jesus) mao ang magahatag kaninyog kagawasan, kamo mahimo gayud nga mga tawong gawas." (Juan 8:36).

3. ANG MAHINULSULONG KSINGKASING

Kini nga larawan nagpakita kanato sa kahimtang sa kasingkasing sa usa ka matinud-anong naghinulsol nga makasasala. Naamgohan na niya ang kabug-at ug kangil-ad sa iyang mga sala nga gipakamatyan ni Jesus sa krus. Sa pagtan-aw niya sa krus nga gipadayag kaniya sa anghel nga mao ang Pulong sa Dios, nahilap sa paghinulsol ang iyang kasingkasing. Halawom

ug kinasingkasing nga pagbasol ug kasubo ang iyang bation tungod sa kadaghan sa iyang mga sala. Inigkita niya sa dakung gugma sa Dios nga gipadayag diha kang Cristo Jesus, kini nga gugma nagtunaw sa iyang kasingkasing, labi na kung maamgohan niya nga si JesuCristo, ang anak sa Dios, mianhi aron pagluwas kaniya gikan sa iyang mga sala ug aron mamatay sa krus nga tinunglo puli sa iyang dapit.



Nasabtan na sa mahinulsolong makasasala ang kamatuoran nga si Jesus gidagmalan, gikoranaha'g tunok, ug gilansang ang Iyang mga kamot ug tiil ug namatay sa krus tungod sa atong mga sala. Nahatagan siya'g bag-ong kasingkasing ug kinabuhi. Inigbasa niya sa Pulong sa Dios diin makita niya ang iyang kaugalingon ingon sa iyang pagtan-aw sa salamin, labaw niyang maamgohan kung unsa na siya kalayo gikan sa Dios ug kung giunsa niya paglapas ang mga Kasugoan. Matinud-anon ug diosnong kaguol ug pagbasol ang mikuyanap kaniya. Sa hilabihan niyang paghinulsol nga inubana'g mapait nga mga luha, si Jesus usab nagpaduol kaniya. Ang gugma ug kalinaw sa Dios mosulod sa iyang kasingkasing sa pagkaamgo niya nga "ang dugo ni Jesus nga Iyang Anak nagahinlo kanato gikan sa tanang sala." (1 Juan 1:7).

"Ang Ginoo haduol niadtong mga dugmok ug kasingkasing ug nagaluwas Siya niadtong mahinulsolon sa espiritu." (Salmo 34:18).

Sa makakausa pa nagpahayag ang Pulong sa Dios, "Niadtong tawhana motan-aw Ako, bisan pa kaniya nga kabus ug adunay espiritu nga mahinulsolon, ug nga nagapangurog tungod sa Akong pulong." (Isa. 66:2). Ang Espiritu Santo mohunghong sa mga pulong ni Jesus kaniya, "Anak, paglipay, gipasaylo na ikaw gikan sa imong mga sala." Sa pagtanaw niya sa krus ug sa dugo ni Jesus nga giula sa krus, ug kung toohan niya nga kining tanan gihimo alang kaniya, mabati niya nga nawala na ang kabug-at sa sala, kay gipas-an na ni Jesus ang atong kasakitan ug kasubanan. "Siya ginasamaran tungod sa atong kalapasan. Siya napangos tungod sa atong mga kasal-anan;" ug nga "gibutang sa Ginoo diha Kaniya ang kasal-anan natong tanan." (Isa. 53).


Ang Espiritu Santo ug ang gugma sa Dios mao nay nanagiya sa nalimpiohang kasingkasing. Sa pagtan-aw niya sa krus uban sa pagtoo kang Jesus, mabati niya nga siya gipasaylo na. Nadawat sa iyang kasingkasing ang pasalig nga ang dugo ni Jesus, ang Anak sa Dios

naghinlo kaniya gikan sa tanan niyang sala. (1 Juan 1:7). Masaligon na siya nga ang motoo kang Jesus dili malaglag, kondili may kinabuhing dayon. (Juan 3:16). Kay diha kang Jesus "may katubsanan kita pinaagi sa Iyang dugo, may kapasayloan alang sa atong mga paglapas, sumala sa kadagaya sa grasya sa Dios." (Ef.

1:7). Ang dapit sa makasasalang kaibog sa unod gipulihan na sa matinud-ong tinguha pagkinabuhi alang sa Dios ug sa pag-alagad Kaniya "nga maoy unang nahigugma kanato." Ang Dios na ang iyang higugmaon ug ang mga butang diosnon inay ang kalibutan ug ang mga butang dinhi sa kalibutan.

Busa niini nga larawan makita nato nga ang mga mananap nga naghulagway sa sala anaa na gawas sa kasingkasing. Nawili usab si Satanas pagbiya sa kanhi niyang puloy-anan. Anaa siya nagpanglingi pa ug naglaum nga makasulod siya'g balik. Kana ang hinungdan sa pagpasidaan ni Jesus kanato sa pagtukaw ug pagampo; suklan ang yawa aron kini mokaratil pagdagan gikan kanato.

4. GILANSANG UBAN KANG CRISTO



Kini ang larawan sa usa ka Kristohanon nga nakadawat ug hingpit nga kalinaw ug kaluwasan pinaagi sa pag-antus sa atong Ginoo ug Manluluwas nga si Jesu-Cristo. Busa siya nagdayeg sa walay lain "gawas sa krus sa atong Ginoong Jesu-Cristo, nga pinaagi niini, bahin sa kalibutan, kita gikalansang na sa krus; ug bahin kanato, ang kalibutan gikalansang na sa krus." (Gal. 6:14). Namatay si Jesus sa krus aron kita "mamatay ngadto sa sala ug mabuhi ngadto sa pagkamatarung" (1 Pedro 2:24); usa ka Kristohanon nga patay na sa mga butang sa kalibutan. Gimandoan kita nga "panaggawi kamo diha sa espiritu, ug ayaw ninyo pagtumana ang mga pangibog sa unod." (Gal. 5:16,25).

Ang haligi nga gigapusan ni Ginoong Jesus pagkahuman Siya gihuboan sa Iyang bisti gipakita dinhi sa larawan sa kasingkasing, ingon man ang latigo ug bunal nga gidapat nila Kaniya. Gisamaran Siya tungod sa atong kalapasan tungod kay "ang silot sa atong pakigdait diha sa ibabaw Niya."

Gibiaybiay Siya ni Herodes ug sa mga tawo, ug unya human nila Siya dagmali, ila Siyang gikoronaha'g tunokon-inay bulawan nga korona, ug gipakupot Siya'g baston nga bagakay-inay baston nga angay sa usa ka hari. Unya miluhod sila aron lang pagbugalbugal Kaniya, ug miingon pa sila, "Mabuhi ang Hari sa mga Judio!" Ug gilukaan nila Siya ug ilang gikuha Kaniya ang baston nga bagakay ug gihapak kini sa Iyang ulo. Human sa ilang pagbugalbugal Kaniya, gidala nila Siya aron ilang ilansang sa krus.

Adunay daghang gitawag-nga-mga-Kristohanon nga nanagampo sa sulod sa simbahan, nanagdawat sa Panihapon sa Ginoo, nanagdayeg sa Dios pinaagi sa mga alawiton, apan kanunay nilang gilansang ang Manluluwas pinaagi sa ilang dautang mga buhat. "Dili ang tanang magaingon Kanako,

'Ginoo, Ginoo,' makasulod sa gingharian sa langit, kondili ang nagatuman sa kabubut-on sa Akong Amahan nga anaa sa langit." (Mat. 7:21-27).

Makita usab nato sa larawan ang puyo ni Judas nga gisudlan sa kuwarta. Giluiban ni Judas si Jesus pinaagi sa pagbaligya Kaniya sa kantidad nga trayenta ka buok nga salapi, tungod kay ang iyang paghigugma sa kuwarta mibihag sa iyang kasingkasing ug mibuta sa iyang hunahuna. Ang sulo, kadina, ug uban pa maoy gigamit sa mga sundalo sa pagdakop nila kang Jesus sa panahon sa gabii. Ang dayis nga gigamit sa sugal, gigamit usab sa mga sundalo sa ilang pagsugal kung kinsay manag-iya sa bisti ni Jesus, ug sa ingon natuman ang tagna sa Pulong sa Dios. "Gibahinbahin nila ang Akong bisti sa taliwala nila, ug sa Akong kupo nanagripa sila." (Salmo

22:18). Gikuha nila ang tanang iya ni Jesus, apan si Jesus mismo ilang gisalikway ug miingon sila, "Dili namo gustong magmando kining tawhana kanamo."

Mahinamon ang katawhan nga makadawat sa tanang panalangin gikan sa Dios, ulan ug adlaw, apan dili sila buot magpasakop sa hingpit nga pagmando sa Dios. Alang sa kadaghanan, ang Dios maayo lang tawgon kung panahon sa kagubot ug kagul-anan.


Pinaagi sa bangkaw, gidughang sa mga sundalo ang kilid ni Jesus "ug gilayon dihay miagay nga dugo ug tubig." (Juan 19:33-37). Sa wala pa motogaok ang manok, gilimod ni Pedro si Jesus sa makatulo, apan kini iyang gibasulan ug mihilak siya sa hilabihang kasakit. Ikaw, imo bang gipahayag si Jesus pinaagi sa imong mga pulong ug buhat, o kaha naulaw ka pagbuhat niini sa atubangan sa nga tawo? Si Jesus miingon, "Bisan kinsa kadtong moila Kanako sa atubangan sa mga tawo, ilhon Ko usab siya sa atubangan sa Akong Amahan nga anaa sa langit; apan bisan kinsa kadtong dili moila Kanako sa atubangan sa mga tawo, dili Ko usab siya ilhon sa atubangan sa Akong Amahan nga anaa sa langit." (Mat. 10:32-33).

Miingon usab si Jesus, "Ang wala magpas-an sa iyang krus ug wala magsunod Kanako, dili takus Kanako." (Mat.

10:38), Bulahan kadtong nagatindog ibabaw sa Bato, si JesuCristo!

"O malig-on nga Bato, Nga mig'wa sa kilid mo
'nia ko, salipdan mo; Makapala sa sala
Niadtong tubig ug dugo Ug malig-onan ako."

5. ANG TEMPLO SA DIOS



Kini nga larawan nagpakita sa gilimpiyohan ug gibalaan nga kasingkasing sa makasasala nga naluwas tungod sa madagayaong grasya ug kalooy sa Dios. Nahimo na kining matuod nga templo sa Dios, ang puloy-anan sa Dios, ang Amahan, ang Anak ug ang Espiritu Santo, sumala sa gisaad sa Ginoong Jesu-Cristo, "Kung kinsa ang nahigugma Kanako, iyang pagabantayan ang Akong pulong, ug ang Akong Amahan mahigugma kaniya, ug moanha kami kaniya ug anha kami mopuyo diha kaniya." (Juan 1:23). Pasidunggan sa Dios, panalanginan ug ituboy Niya ang tawo pinaagi kang Jesu-Cristo. (Lucas. 1:52).

Ang kasingkasing nahimo na karong matuod nga templo sa Dios. Ang sala giabog na. Ang Espiritu Santo, ang Espiritu sa Kamatuoran, ang nagpuyo sa kasingkasing, inay ang nagkalainlaing mga mananap nga gimandoan ni Satanas, ang amahan sa bakak. Inay usa kini ka dulumtanang puloyanan sa sala, ang kasingkasing nahimo nang usa ka matahum, mabungahong kahoy o tanaman. Mamunga kini'g mga bunga sa Espiritu, ingon sa gugma, kalipay, kalinaw, pailub, pagkamaloloyon, pagkamaayo, pagkamatimumanon, kaaghop, pagpugong sa kaugalingon ug uban pa nga makalipay sa Dios ug sa tawo. Usa na siya karon ka mabungahong sanga sa Matuod nga Tanum nga Parras-ang atong Ginoong si Jesu-Cristo. Ang hinungdan niining iyang pagpamunga mao nga nagpabilin siya diha kang Cristo, ug si Cristo ug ang Iyang Pulong nagpabilin diha kaniya (Juan 15:1-10). Ingon nga siya napuno ug nabunyagan sa Espiritu Santo, aduna na siyay gahum pagbuntog sa kalibutanong kaibog sa unod ug sa paglansang sa daan nga pagkatawo. Pinaagi sa gahum sa Espiritu Santo makahimo na siya paglakaw diha sa Espiritu ug magmadaugon batok sa dautang tinguha sa unod. Wala na siya magkinabuhi pinaagi sa iyang makita, madungog ug mabati, apan pinaagi sa pagtoo-kay ang pagto kang Cristo Jesus mao ang kadaugan ug kalampusan batok sa kalibutan. Nagkinabuhi siya pinaagi sa masaligon ug dili matarug nga paglaum. Gilig-on siya pinaagi sa mahimayaong paglaum sa haduol nga pag-abut sa atong Ginoong Jesu-Cristo. Nagkinabuhi siya

pinaagi ug uban sa gugma sa Dios, nga molungtud sa hangtud. "Bulahan ang mga maputli ug kasingkasing, kay makakita sila sa Dios." (Mateo 5:8). Si Haring David, bisan pa sa tanang niyang bahandi ug sa tanan niyang kadaugan batok sa iyang mga kaaway, nasayud nga aduna pay labing dakung gubat sa sulod sa iyang kasingkasing. Tungod niining labaw pa niyang panginahanglan, kinasingkasing siya'ng nag-ampo, "Buhatan Mo ako ug usa ka ulay nga kasingkasing, O Dios, ug bag-oha ang usa ka Espiritu nga matul-id sa sulod nako." (Salmo 51:10). Walay makalimpiyo sa kaugalingon niyang kasingkasing, ni makabuhat ug usa ka malimpiyo nga kasingkasing, gawas kung siya moduol sa Dios sa matuod nga pagbasol ingon sa gibuhat siva'g usa ka bag-o nga kasingkasing. Andam ang Dios pagbuhat ug bag-ong butang sa imong kinabuhi. Bisana pag tapakan mo ang gisi ug dunot mong bisti sa imong kaugalingong katarung pinaagi sa haw-ang nga mga saad ug panumpa, dili kini makahimo sa imong kasingkasing nga usa ka angay nga puloy-anan sa Dios. Siya lang ang makatabang kanimo kay Siya maoy nagsaad, "Bisbisan ko kamo sa malinis nga tubig, ug kamo mangahinlo gikan sa tanan ninyong kahugawan, ug gikan sa tanan ninyong dios-dios, hinloan Ko kamo Hatagan Ko usab kamo sa usa ka bag-o nga kasingkasing, ug ang usa ka bag-ong espiritu igabutang Ko sa sulod ninyo. Kuhaon Ko ang baton nga kasingkasing gikan sa inyong unod, ug hatagan Ko kamo sa usa ka kasingkasing nga unod. Ug igabutang Ko ang Akong Espiritu sa sulod ninyo, ug palakton Ko kamo sa Akong kabalaoran, ug kamo magabantay sa Akong mga tulomanon, ug magatuman kanila." (Ezek. 36:25-27). Mao kini ang kahulogan sa Bag-ong Tugon diin gilig-onan sa Dios pinaagi sa dugo sa Iyang Anak, si Jesu-Cristo.


Makita usab nato niini nga larawan ang pagbalik sa anghel. Gitugyanan ang mga anghel ug bulohaton sa pag-alagad kanila nga mga manununod sa kinabuhing walay katapusan ug nagapahaluna sa paglibut sa mga nangahadlok kaniya (Salmo 34:7; 91:11; Dan. 6:22; Mat. 2:13; 13:19; 18:10; Buhat 5:19; 12:7-10).

Makita usab nato ang yawa, nga nagtindog nga duol sa kasingkasing nga daw nagbantay nga moabut ang kahigayonan diin makasulod siya pag-usab sa kanhi niyang puloy-anan. Busa kita gipasidan-an sa pagtukaw ug pag-ampo, kay ang atong "kaaway nga mao ang yawa nagalibotlibut sama sa leon nga nagangulob nga nangitag iyang matukob." (1 Pedro 5:8). Usahay ang yawa nagtakoban nga usa ka anghel sa kahayag, nagpanintal sa dili mabinantayong mga magtotoo sa makasasalang kaibog niining kalibutana. Nanlimbasug siya pinaagi sa paglingla sa paglimbong sa mga pinili gayud. Apan kung atong suklan ang yawa, mokaratil siya pagdagan gikan kanato. (Sant. 4:7)

6. ANG GITINTAL UG NABAHIN NGA KASINGKASING

Kini ang masulob-ong larawan sa usa ka mibalik sa sala. Ang usa ka mata hapit na mopiyoung. Nagpakita siya nga nag-anam nag kabugnaw ug kakatulgon ang iyang kristo hanong kinabuhi. Ang pikas usab nga mata walay kukaulaw nga nagliro-liro, nakigdula sa kalibutan. Nag-anam nag kangitngit ang kahayag sa sulod ug ang mga timaan sa iyang kasingkasing nga nagpakita sa pagka-andam niyang mag-antus uban kang Cristo kulang na ug hapit nang mangatumba. Gilibutan siya sa mga tintal ug nag-anam usab siyag pailalum kanila inay mosukol. Inay maminaw siya sa tingog sa Dios, mao na hinooy iyang gipaminaw ang malinglahong sugyot ug haw-ang nga mga saad sa maninintal. Bisag kanunay pa siyang nagsimba aron pagtago sa iyang pagka-kalibutanon pinaagi sa pagkarelihiyoso, nabugnaw na ang gugma sa Dios sa iyang kasingkasing. Nabahin siya sa duha ka hunahuna ug nalibog siya kung kang kinsa magpasakop. Misalmot na siya sa mga kalibutanong butang ug sa samang panahon nagpaka-aron-ingnon nga gihigugma niya ang Dios. Ang bitoon sa iyang kasingkasing nga mao ang tanlag nag-anam nag kapalong. Ang krus nga kanhi gipasan niya nga mapahiyumon,

nahimo na karong mabug-at nga palas-anon. Nagduhaduha siya sa iyang pagtoo, mihunong siya pagpakigsulti sa Dios pinaagi sa pag-ampo, ug wala na siya magtagad sa kahintang sa iyang kasingkasing. Sa ingon gihatagan niya'g higayon ang maninintal nga nagpaabut gawas sa iyang kasingkasing. Malipayon siyang nakig-uban sa mga tawong kalibutanon kay sa pagpakighiusa sa mga matuod nga magtotoo.



Ang espiritu sa pabo real nga naghulagway sa pagkamapahitason hapit na mosulod. Malagmit nalimtan niya nga siya giluwag pinaagi lamang sa grasya, busa nahimo siyang mapasigarbohong Kristohanon. Ang pagkapalahubog nanuktok sa pultahan kay buot mosulod. Malagmit mahitabo kini sa mga kalingawan uban sa iyang kalibutanong mga higala kay maulaw siya nga unya'g tawgon nga kataw-anan, maluya ug walay pagpakig-uyon kanila ug ang yawa mosulti dayon kaniya nga buhaton niya kay total dili man makadaut sa iyang espirituhanong kinabuhi kining higayona. Bation niya ang mahugawng hunahuna ug makasasalang kaibog sa unod. Mahimong malingaw siya sa mga tiaw nga imoral, motanaw sa mahilas nga mga retrato ug pelikula, ug malipayong makig-uban sa mga tawong imoral ang kinabuhi. Kanunay na siya sa baylehan ug sa salawayong


kalingawan. Gihakop niya ang mga sugyot sa yawa nga sanglit kining mga butanga kinaiyanhon man dili kini sala.

Sa pagkatinuod, dili nato malikayan ang paglupad sa ihalas nga mga langaw ug mahugaw'ng hunahuna sa atong ulo, apan makasala kita kon tugotan nato silang motugpa kanato ug magsaiag sila sa atong kasingkasing hangtud mamiso didto sa ilang yawanong mga buhat. Kung tugotan nato ang yawa pagkupert sa atong usa ka tudlo, segburado gayung hakopon niya ang tibuok natong kamot, magdala sa atong kalag ug espiritu ngadto sa walay katapusang impiyerno. Busa gipasidan-an kita sa Dios paglikay sa kalibutanong kaibog sa kabatan-on ug dili isipong usa ka tiaw ang sala, bisag sa unsa pang matang kini nga moabut kanato. Dagan paingon kang Jesus, ang Manluluwas, ang Mananaog.

Ang tawo'ng makita sa larawan nga nagduslak sa kasingkasing sa punyal naghulagway sa mga nagabiaybiay ug nagabatok sa Kristohanon. Pinaagi sa ilang makadaut sa dungog nga dila ug mabiaybiayong baba, ilang gidunggab ug gisamaran ang kasingkasing sa Kristohanon-mga pag-

ataki nga dili masuklan sa nabahin nga kasingkasing. Nagsugod na ang iyang kahadlok sa tawo inay sa Dios. Tungod sa kahadlok sa isulti sa tawo ug buhaton, nahimo siyang ulipon sa tawo ug nagpalayo siya sa Dios. Ang kasuko ug kadautan sa buot mopaibabaw sa panahon sa kasamok ug kapakyasan. Namugos silang mosulod. Mokamang sa walay Panagana kanang yawan-ong halas sa pangabugho nga bation sa tawo kung ang uban labaw pang mauswagon. Kung kini makusulod, nan mabuksan na dayon ang pultahan sa kasingkasing pagpasulod sa sala sa pagdumot ug pagkamapahitas-on. Masayon kaayo ang gugma sa salapi pagkamang nga mosulod sa atong kasingkasing, gawas kon sundon nato ang pasidaan sa atong Ginoong Jesus sa Iyang pag-ingon, "Pagtukaw ug pagampo kamo aron dili kamo mahidalinas ngadto sa panulay." (Mateo 26:41). "Busa siya nga nagadahum nga maayo na niyang pagkabarug, magbantay basig mapukan siya." (1 Cor. 10:12). Kinahanglan isul-ob nato ang tibuok hinagiban sa Dios, aron makabarug kita batok sa mga mali patlipatong kaugdahan sa yawa. (Ef. 6:11-18).

7. ANG KASINGKASING NGA MIBALIK SA SALA



Nagpakita kini nga larawan sa kahimtang sa kasingkasing sa tawong mibalik sa sala. Human siya kahayagi ug kahatagi sa langitnong mga grasya ug nahimong mag-aambit sa mga gasa sa Espiritu Santo, nahulog pa gayud siya balik sa sala. Nagpakita usab kini sa kahimtang sa tawo nga wala sukad maghinulsol, ni magpasakop sa Dios bisan pag gitanyag ug gipadayag na kaniya ang kamatuoran sa Ebanghelyo, ang gitawag nga "Maayong Balita." Ang tawong magahig kasingkasing sa mga tawag sa Dios kaniya, mosamot kadautan bisan pag maningkamot siya pagbag-o sa iyang kaugalingon.

Bahin sa tawong mibalik sa kadautan, gihulagway ni Jesus mismo ang kahimtang niining tawhana sa Iyang pag-ingon, "Sa diha nga ang mahugaw'ng espiritu makagula na sa tawo, kini

mosuroy latas sa mga dapit nga mamala aron sa pagpangita'g pahulay; ug sa wala siyag makaplakan niini, siya magaingon, Mobalik hinoon ako sa akong balay nga gigikanan. Ug sa pag-abut niya, iyang makita kini nga sinilhigan na ug maayo nang pagkahimutang. Ug unya molakaw siya ug magkuhag laing pito ka mga espiritu nga labi pang dautan kay kaniya, ug sila

mosulod ug mopuyo niini; ug ang ulahing kahimtang niadtong tawhana molabi pa kangil-ad kay sa sinugdan." (Lucas 11:24-26). "Sila hingmatudan sa tinuod nga sanglitanan nga nagaingon, Gibalikan sa iro ang iyang kaugalingong suka; ug tapus madigo ang anay, sa yanang mobalik siya sa paglunang." (2 Pedro 2:22).

Dayag kaayong gipasabut niini nga mga pulong sa Kasulatan ang kahimtang sa tawong mibalik sa sala o sa makasasalang nagdumili paghinulsol. Ang sala uban sa iyang mga pagpanlimbong mibalik aron pagpuyo ug paghari sa kasingkasing. Bisan pa gani ang nawong sa tawo nagpakita sa kahimtang sa iyang kasingkasing. Ang Espiritu Santo, kanang buotang salampati, napugos pagbiya sa kasingkasing kay ang sala ug ang Espiritu Santo dili mahimong mag-ipon pagpuyo. Dili gayud mahimo nga ang kasingkasing himoong templo sa Dios ug unya langub usab ni Satanas. Ang anghel, ang Pulong sa Dios, kinahanglan mopahawa nga masulobon, nagpanglingi pa ug naglaum nga ang tawo maghinulsol ingon sa anak nga nawala nga "nangandoy sa pagbusog sa iyang kaugalingon bisan pa sa mga bunga sa biyatilis nga ginakaon sa mga baboy; ug walay tawo nga mihatag kaniya'g bisan unsa. Sa nahiulian na siya sa pamuot, siya miingon, Motindog ug moadto ako sa akong amahan ug ingnon ko siya, Amahan, nakasala ako batok sa langit ug sa imong atubangan; ug dili na ako takus pagataw'gon pa nga imong anak." (Lucas 15:16,18,19). Sa pagkakita sa amahan sa iyang mahinulsolong anak, gipasaylo niya ug gidawat balik sa ilang puloy-anan.


Ang larawan niini nga kasingkasing wala magpakita ug matuod nga paghinulsol, ni pagbalik ngadto sa Dios, ni pagpangayog pasaylo sa tiilan ni Jesus. Ingon sa napasos sa binagang puthaw ang iyang tanlag ug gipahilum. Aduna siyay mga dalunggan apan dili niya madungog ang puno sa pangamuyo nga tingog ni Jesus. Aduna siyay mga mata apan wala niya makita ang impiyernong anaa sa iyang tiil nga abiyerto ug andam pagdawat kaniya. Wala na siya batiag kaulaw sa iyang mga sala. Si Satanas na ang naghari sa iyang kasingkasing ug naglingkod ingon nga hari sa iyang trono. Mahimong mapasigarbohon pa siya sa iyang gipakita sa katawhan nga kaligdong ug pagka talahuron, pagkarelihiyoso ingon sa gipaputi nga pantiyon, "apan sa sulod puno sa mga bukog sa mga patay ug sa tanang kahugawan." (Mateo 23:27).

Ang amahan sa mga bakak mao nay nag-angkon sa dapit sa Espiritu sa Kamatuoran. Giubanan sa mga piniling demonyo ug mahugaw'ng espiritu ang matag mananap ug matag sala ug sila nay nanag-iya sa kasingkasing. Bisan pag gusto sa tawo pagbuhi sa iyang kaugalingon gikan niining mga dautang nagpaantus kaniya, wala siyay mahimo kay siya gigapos na nila. "Ang tawo nga makalapas sa Kasugoan ni Moises pagapatyon sa walay kukalooy pinasikad sa panghimatuod sa duha o tulo ka mga saksi. Sa inyong paghunahuna, unsa ka labi pa ka mabug-at gayud sa silot nga mahiaguman sa tawo nga magayatak sa Anak sa Dios, ug magapakawalay bili sa dugo sa pakigsaad nga pinaagi niini gibalaan siya, ug magapanamastamas sa Espiritu sa grasya?" (Heb. 10:28,29; 2 Pedro 1:14).

Kung ugaling ang imong kasingkasing nahisama sa kahimtang niini nga larawan, mahal nga higala, ayaw paglangan, dangop dayon sa Dios gikan sa giladmon sa imong kasingkasing. Mahimo Niya ang pagluwas kanimo sa hingpit ug andam kaayong mopasaylo kanimo gikan sa tanan mong mga sala, kung ikaw moduol Kaniya uban sa matuod nga paghinulsol. Mahimo Niya ang paggapos sa yawa ug sa tanang panon sa kangitngit, ug abugon sila gawas sa imong kasingkasing, kung kinabubut-on ka lang nga motugot Kaniya paghimo niini. Moduol ka kaniya ingon sa sanlahon nga miduol kang Jesus ug miingon, "Kon buot Ka, makahinlo Ikaw kanako." Si Jesus mitubag, "Buot ako; mamahinlo ka." (Marcos 1:40,41). Apan kung magpadayon ka sa katig-a sa imong kasingkasing ug maoy higugmaon ang kangitngit inay ang kahayag, nan,

wala ka nay paglaum, walay panabang, kay maoy imong gipili ang kamatayon inay ang kinabuhi-"kay ang suhol gikan sa sala mao ang kamatayon." (Roma 6:23).

8. ANG ALAOT NGA MAKASASALA




Makita nato niini nga larawan ang matig-a ug kasingkasing nga makasasala ug naglanganlangan pagdawat sa iyang kaluwasan. Nagpadulong siya sa iyang kamatayon ug malagmit nga puno sa kasakit ang iyang lawas ug ang iyang kalag napuno sa kahadlok sa kamatayon. Miabut ang kamatayon (ang kalabera) sa hinanali ug wala paabutang oras. Wala na ang malimbongong kalipay nga gikahatag kaniya sa sala, ug mao nay iyang giatubang ang mangilad nga kamatuoran sa makahahadlok nga bayad sa sala. Nagpaabut sa biktima ang kasakit sa impiyerno. Bisan pag nangandoy siyang magampo, wala na niya mahimo ang pagpakigsulti sa Dios kang kansang gugma iyang gisalikway. Nangahadlok ang iyang mga higala pagtan-aw kaniya nga nagtinga ug wala na makatabang kaniya ang ilang haw-ang nga pulong sa

pagligon kaniya. Ang iyang bahandi nga malagmit nakuha niya sa dautang paagi dili makahatag ug lugway sa iyang kinabuhi, ni makaluwas sa iyang kalag, ni makapanas sa kasakit nga iyang gibati. Naglisud siya paghunahuna sa Dios tungod kay dili siya tugotan sa yawa paghimo niana.

Maorag gibiaybiay siya sa mga butang nga kanhi iyang gihigugma ug gipakabuhian. Walay tawong makatabang kaniya tungod kay gisalikway niya ang grasya sa Dios ug nahulog siya sa tunglo sa balaod. Naamgohan na dayon niya nga "maoy butang nga makalilisang ang pagkahulog ngadto sa mga kamot sa Dios nga buhi." (Heb. 10:31). Naglanganlangan siya kay naglaum pa man siya nga makighusay sa Dios sa ubang adlaw o kaha kung hapit na siya mamatay. Apan naamgohan niya nga ulahi na ang tanan. Libo ka libong mga tawo ang nangamatay sa hinanali ug wala na sila mahatagi'g higayon pagdangop sa Dios. Busa kinahanglan gayud ang pagpangita sa Dios samtang makita pa Siya. Ang makalipay ug makaluwas nga mga pulong sa Dios dili na madungog niining nagtinga nga makasasala nga

misalikway sa grasya ug gugma sa Dios sa buhi pa siya. Mao na hinooy iyang nadungog ang tingog sa Maghuhukom, ang Manluluwas nga iyang gisalikway, nga nagingon, "Pahawa gikan Kanako kamong mga tinunglo, ngadto sa kalayong walay pagkatapos nga gitagana alang sa yawa ug sa iyang mga manolunda." (Mateo 25:41). "Ang tawo ginabut-an nga mamatay sa makausa ra, ug tapus niana mao ang hukom." (Heb. 9:27).

9. ANG MADAUGONG KASINGKASING



Naghulagway kini nga larawan sa usa sa Kristohanon nga nagantus apan nagmadaugon sa mainitong pagsulay ug pagtintal. Gilibutan siya sa mga pagtintal apan nagpabilin siyang malig-on ug matitud-anon hangtud sa katapusan ug nahimong madaugon tungod kang Jesu-Cristo. Misalmot siya sa Kristohanong lumba ug mailhutay siya pagdagan nga mapailubon ug wala siya magtan-aw sa wala ug too apan nagtutok lang "kang Jesus nga mao ang Maguugmad ug Maghiningpit sa atong pagtoo." (Heb. 12:1,2).

Gilibutan ni Satanas ug sa tanan niyang panon ang kasingkasing sa magtotoo. Napakyas ang ilang pagpaningkamot sa pagsalaag sa anak sa Dios. Ania usab dinhi gihulagway ang pagkamapahitas-on, paghigugma sa salapi, ang yawan-ong imoralidad ug uban pang mga sala. Makita nato

karon ang asno inay leopardo, kay ang sala kanunay nagtintal kanato sa lainlaing paagi ug sa lainlaing hitsura. Nagtakoban kini sa nagkalainlaing ngalan. Apan masayon mailhan sa mabinantayong Kristohanon ang sala bisan pag kini moduol kaniya sa ngalan sa relihiyon, o kaha ingon sa usa ka anghel sa kahayag, kay ang Pulong sa Dios ug ang Espiritu sa Kamatuoran nagtultol kaniya ngadto sa tanang kamatuoran. Anaa pay tawo nga nagkupert ug usa ka basong bino aron pagtintal sa Kristohanon sa mga kalingawan niining kalibutan. Apan wala kini molampus sa matitud-ong Kristohanon kay gilansang na siya uban kang Cristo ug patay na sa sala ug sa kalibutan. Ang ikaduhang tawo sa larawan nagdunggab sa Kristohanon. Ang dautang mga pulong pagdaut sa dungog, libak, biaybiay ug mga hulga sa mga kaaway sa Dios maoy kanunay nagdunggab sa kasingkasing sa matuod nga magtotoo. Kadaghanan sa nagtawag sa ilang kaugalingon nga mga Kristohanon maoy sagad naghimo niini. Apan ang matuod nga magtotoo patay na sa bisag unsang isulti sa mga tawo ug mao lamay

mahinungdanon kaniya ang pulong sa Dios. Kanunay niyang nahinumdoman ang mga pulong ni Jesus. "Bulahan kamo sa diha nga panamastamasan kamo sa mga tawo, ug pagalutoson kamo, ug pagabutangbutangan

kamo sa tanang matang sa kadautan batok kaninyo tungod Kanako. Kinahanglan managmaya ug managkalipay kamo, kay daku ang inyong balus didto sa langit." (Mat. 5:11,12).

Nanlimbasug sa tanan nilang mahimo ang sala, ang unod (ang kaugalingon) ug ang yawa aron mobulag ang Kristohanon gikan sa gugma sa Dios. Apan sa tumang kalipay ug pagsalig makasulti siya "Kinsa ba ang makapahimulag kanato gikan sa gugma ni Cristo? Ang pag-antus ba, o ang kasakitan, o ang paglutos, o ang gutom, o ang kahubo, o ang katalagman, o ang espada ba?" Roma 8:35).

"Dili, hinonoa niining tanang mga butanga labaw pa kita ka mga mananaug pinaagi Kaniya nga nahigugma kanato." (Roma 8:37). Kay gikasul-ob na niya ang tibuok hinagiban sa Dios, nan, makaharong na siya sa adlawng dautan ug magmadaugon batok sa tanang tentasyon pinaagi kang Jesu Cristo nga mipukan sa tanang pagsulay ug pagtintal. Pinaagi Kaniya kita usab magmadaugon ug makapanag-iy sa korona sa himaya.

Dayag kaayo ug hayag Ang Bitoon sa iyang tanlag. Puno sa pagtoo ug sa Espiritu ang iyang kasingkasing. Ang anghel, nga naglarawan sa Pulong sa Dios, nagpahinumdom kaniya sa bililhong saad ngadto kanila nga nagmadaugon ug milahutay hangtud sa katapusan. "Ang magamadaugon pagatugotan Ko sa pagkaon sa bunga sa kahoy nga nagahatag ug kinabuhi nga anaa sa paraiso sa Dios." "Kaniya nga magamadaugon, walay gahum sa pagdaut kaniya ang ikaduhang kamatayon." "Ang magamadaugon pagahatagan Ko sa mana nga tinagoan, ug pagahatagan Ko siyag usa ka gamayng bato nga puti nga sinulatan ug usa ka bag-ong ngalan." "Kaniya nga magamadaugon ug magatuman sa Akong mga bulohaton hangtud sa katapusan igahatag Ko ang pagpanggahum." "Ang magamadaugon pagasul-oban ug mga bisti nga maputi, ug ang iyang ngalan dili Ko pagapapason gikan sa basahon sa kinabuhi, hinonoa igatug-an Ko ang iyang ngalan sa atubangan sa Akong Amahan ug sa atubangan sa Iyang mga manolunda." "Siya nga magamadaugon, Akong pagahimoon nga haligi diha sa templo sa Akong Dios; ug dili na siya magagula niini." "Ang magamadaugon pagatugotan Ko sa paglingkod sa Akong trono uban Kanako, maingon nga Ako usab nagmadaugon ug milingkod uban sa Akong Amahan diha sa Iyang trono." (Pin. 2:7,11,17,26; 3:5,12,21).

ANG ABIYERTONG PUTOS SA KUWARTA nagpakita nga ang iyang kasingkasing ug ang iyang kuwarta gihalad niya ngadto sa Dios. Inay mag-usik-usik siya sa iyang katigayonan dinhi sa yuta, andam hinoon siyang motabang sa mga kabus, maghatag sa diyes porsiyento sa iyang pinangitaan ug maghalad bisan pa gani sa iyang tanang kabtangan ngadto sa Dios. Gamiton niya ang tanan alang sa himaya sa Dios.

ANG PAN UG ANG ISDA nagpasabut nga nagpuyo siya sa malinis ug maligdong nga kinabuhi. Wala niya hugawi ang iyang kaugalingon pinaagi sa makahubog nga ilimnon, o pagkaon ug dugo o sa mga mananap nga gituok, o sa bisag unsang mahugaw nga pagkaon. Wala siya mag-usik-usik sa iyang kuwarta. Wala niya hugawi ang iyang lawas (nga mao ang templo sa Dios) pinaagi sa pagmama o pagsigarilyo I pagtabako. Wala siya maggamit sa mga tabletas o tambal nga makadaut. Mao ray iyang gikaon ang malimpiyo, masustansiya ug makaayo sa lawas nga pagkaon. Nahimong balay sa pag-ampo ang iyang kasingkasing. Nagsimba siya kanunay, bisag maayo o dili ang panahon o bisag unsay mahitabo. Buot siyang kanunay mag-ampo ug buhaton niya kana sa simbahan, o sa balay uban sa iyang pamilya, o kung siya maginusara, kay nasayud siya nga dili motunhay ang usa ka Kristohanon kung wala siyay pakighiusa sa Dios pinaagi sa pag-ampo.

ANG ABIYERTONG LIBRO nagpasabut nga bukas nga libro ang Biblia alang kaniya. Gibasa niya ug gitun-an kini matagadlaw ug nakakaplag siyag kaalam, kalig-on, kinabuhi, kahayag ug dili ikaasoy nga bahandi gikan sa Biblia. Nahimo kining usa ka suga nga nagdan-ag sa iyang pagalaktan ug usa ka espada diin mabuntog niya ang iyang mga kaaway.

Usa kini ka matag-adlaw nga espirituhanong tinapay alang sa iyang kalag, tubig nga motagbaw sa iyang kauhaw ug molimpiyo sa kahugaw, ug usa ka salamin diin makita niya ang iyang kaugalingon.

Malipayon siyang nagpas-an sa krus kay nahibalo siyang walay korona kung walay krus. Tungod kay nasayud siya nga gibanhaw siya uban kang Cristo ngadto sa bag-ong kinabuhi, maoy gipangita niya ang mga butang langitnon, mga butang nga walay katapusan, mga butang nga dili makita. Andam siay pagtagbo sa Dios. Sama siya sa kahoy nga natanum sa daplin sa kasapaan sa tubig ug pagabut sa tingpamunga, namunga siyag bunga. Wala siyay kahadlok sa kamatayon kay puno ang iyang kasingkasing sa hingpit nga gugma sa Dios, nga nadawat niya pinaagi sa Espiritu Santo.

10. ANG MAHIMAYAONG PAGPAULI



Miingon si Jesus, "Ako mao ang pagkabanhaw ug ang kinabuhi. Ang mosalig Kanako, bisan siya mamatay, mabuhi siya, ug ang tanan nga buhi ug nagasalig Kanako dili na gayud mamatay." (Juan 11:25,26). "Ang magapatalinghug sa Akong lulong ug magatoo kaniya nga nagpadala Kanako, may kinabuhi nga dayon; siya dili pagahukman, hinonoa nabalhin na siya gikan sa kamatayon ngadto sa kinabuhi." (Juan 5:24). Wala nay kahadlok sa kamatayon ang Kristohanon. "Ang kamatayon gilamoy diha sa kadaugan. O kamatayon, hain na ang imong pagkamadaugon? O kamatayon, hain na ang imong ikot? ...Salamat sa dios nga mao ang nagahatag kanato sa kadaugan pinaagi sa atong Ginoong Jesu-Cristo." (1 Cor.15:54-57).

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za

Le livre du "Coeur de l'homme" peut etre obtenu en plus de 538 langues et dialectes parles dans le monde entier, a savoir: Afrique, Amerique, Asie, Extreme Orient, Europe. Notre Livre du Coeur est maintenant aussi disponible sur votre Telephone cellular, plaques, etc. de www.angp-hb.co.za

Este livro "O Coracao do Homem" e obtfdo em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem tambem esta agora disponivel em telefone celular, tablets, etc. de www.angp-hb.co.za



The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent etre obtenues en tableaux de couleur, format 86 x 61 cm, avec des physionomies europeennes ou africaines. Ils peuvent etre utilises en meme temps que le livre du coeur pour des classes bibliques, a l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtfdos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta-se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratuitamente a literatura evangelica, livros e folhetos em mais de 538 lnguas diferentes escreva para:

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations
Une Mission de litterature evangelique financee de dons
Missao de literatura Evangelica financiada por donativos

(Reg. No. 1961/001798/08)